

Eleisaun no distorsaun atensaun públiku ba Seguransa

Guteriano Neves
Peskizador hosi La'ó Hamutuk

Eleisaun, iha nasaun demokratiku ne'ebé de'it, sempre sai hanesan momentu ida ba politikus sira ba halo fali interasaun – *interaksi* - ho sira nia konstituente. Atu optimista oit'oan, iha tempu hanesan, konstituente sira mós evalua politikus sira nia servisu, sira nia proposta, sira nia vizaun, no mós bele desidi sira hakarak atu fó fiar ba partidu ida ne'ebé mak atu ukun. Bazeia ba razaun ida ne'e, implika katak programa dezentvolvimentu mak tenki sai baze ba votantes sira atu hili. Tanba ne'e, programa sira ne'e mak hetan atensaun barak liu iha nivel hotu-hotu.

Infelizmente, ida ne'e la'os kazu iha Timor agora. Invez de fó atensaun ba programa ba tempu naruk, ita barak preokupa barak liu kona ba violensia fiziku ne'ebé karik mosu hosi eleisaun. Tuir kerek na'in nia observasaun, tanba atensaun barak liu ne'ebé ita fó ba violensia fiziku iha eleisaun, hanesan konsekuénsia, ita lakon oportunidade atu husu politikus sira nia planu ba tempu naruk liu, ne'ebé tuir hau nia haree, importante liu. Tanba ne'e, atensaun barak liu ba violensia halo distorsaun ba atensaun públiku ba asuntu importante liu ne'ebé ita tuir lolos ita hotu tenki haree.

Iha enkontru ida entre ONG sira ho misaun ONU nian iha Timor-Leste (UNMIT) iha Fongtil semana hirak ba kotuk, asuntu violensia durante eleisaun sai asuntu importante ne'ebé diskuti. Ne'e la'os koincidente ida. Agora dadaun, ema barak – ajensia internasional, media, no observador sira – tau hela matan ba eleisaun tinan ida ne'e. Atensaun ne'e mós tanba iha konsiderasaun katak eleisaun ida ne'e hanesan momentum atu evalua maturidade demokrasia iha Timor. Hosi saida mak hau observa kona ba statementu no komentariu, no notisias sira kona ba Timor durante ne'e, iha preokupasaun boot se violensia mosu fila fali durante eleisaun. Preokupasaun ida ne'e lejítimu, konsidera ba ita nia istoria kolonializmu, okupasaun militar durante 1975-1999, violensia 1999, no mos krize 2006. Hanesan eransa hosi ne'e, ema barak sei trauma.

Instituisaun boot hanesan ONU, iha okaziaun barak preokupa liu kona ba estabilidade durante tinan eleisaun. Ida ne'e tanba hosi perspetiva ONU nian, saida mak akontese depois eleisaun la dun importante, duke violensia durante eleisaun; no mos prosesu tranzisaun governu nian; tempu ne'ebé sira sei iha Timor.

Maski observasaun no preokupasaun sira ne'e lejítimu, maibé ita tenki rekoñese katak iha mudansa barak ona ne'ebé akontese. Tanba ne'e tuir hau nia observasaun, problema boot liu mak wainhira ita preokupa hotu ba violensia ne'ebé relasiona ho atividade eleisaun, ita haluha tia katak iha asuntu fundamental balu ne'ebé tuir lolos tenki hetan atensaun barak liu. No hanesan konsekuénsia, wainhira ita haluha tia problema sira ne'ebé fundamental hirak iha leten, ita haluha katak problema instabilidade boot liu sei mosu iha futuru (tinan 10-15 oin mai), ne'ebé tuir lolos ita bele prevene agora.

Bazeia ba situasaun ida ne'e, primeiru, ita tenki haree seguransa iha kontekstu luan liu duke konseitu seguransa ida agora ne'e. Seguransa la'os de'it katak laiha violensia fiziku; maibe mos kona ba violensia struktural sira ne'ebe iha. Violensia struktural ida ne'e nia impaktu boot liu duke violensia fiziku. So de'it tanba ita preokupa barak liu ho violensia fiziku, ita haluhan tia violensia struktural ida ne'e. Ita mos tenki konsente katak Timor la'os presiza de'it estabilidade ba 2012 ka eleisaun. Timor oan presiza estabilidade ba tempu naruk.

Maski ema barak preokupa kona ba violensia durante eleisaun, de faktu katak to'o agora, maski kampaña eleisaun la'o loron hirak ona, seidauk iha relatório ruma katak violensia ruma ne'ebé rezulta

ema balu mate. Iha parte seluk, iha Kuarta (14/03), Diariu Timor Post publika katak ema na'in 11 mate tanba Dengue.

Kazu ida ne'e hau foti so atu reflata de'it situasaun boot liu iha Timor. Tanba konseitu seguransa ida ne'ebé kloot ne'e, ema hanoin katak atu mosu paz no estabilidade, tenki haforsa polisia no militar lori aumenta numeru Polisia no militar, aumenta kilat, kareta, motor, no facilidade seluk tan. Maski ida ne'e importante, seguransa la'os de'it katak laiha violencia. Seguransa tenki haree liu kona ba kondisaun ba ema atu bele sustenta moris no mekanismu sira atu prevene violencia. Ita presiza liu atu haree kona ba servisu sosiais hanesan Saúde, Edukasaun, Be mós no Saneamentu, Kampu do Servisu, Ai-han, sistema judisiariu, igualidade sosial, no kondisaun em jeral ba ema atu bele sustenta ninia moris no prepara ninia futuru. Maski ema barak la fó atensaun ba asuntu hirak ne'e, statistika hatudu katak kada tinan, labarik ne'ebé mate wainhira moris mais ou menus 1,300. Inan mate wainhira partus mak mais ou menus 135. Ema ne'ebe mate tanba moras s sira ne'ebe tuir lolos ita bele prevene liu hosi saneamentu, edukasaun, saude preventiva, aumenta nutrisaun, nsst mos as. Ida ne'e atu hatudu de'it katak ema mate ba violencia fiziku kada tinan ki'ik liu se ita kompara ho labarik tinan lima mai kraik ne'ebe mate tanba moras sira ne'ebe ema bele prevene iha pais sira seluk.

Edukasaun importante ba futuru labarik nian no nasaun nian. Se ita bazeia ba statistika sensus populasaun Timor 2010 nian, labarik ho idade 0-14 hamutuk 441,906. Ida ne'e kontribui ba 41% populasaun Timor nian. Ita dala barak hateten katak sira ne'e mak futuru nasaun nian. Se ita seriu duni ho statementu ne'e, entaun sira nia futuru nu'udar futuru nasaun nian. Ho liafuan seluk, wainhira ita la prepara sira nia futuru, liu hosi investimentu iha edukasaun, barak mak sei sofre hosi malnutrisaun, barak mak sei sofre hosi malaria, dengue, diarea, ne katak futuru nasaun ne'e nian sei nakukun. Maibé iha Timor, wainhira ita koalia kona ba seguransa, ita haluhan tia seguransa labarik sira ne'e nian, inklui seguransa ba sira nia futuru. Se sira laiha seguransa ba sira nia futuru, ne'e katak possibilidade atu mosu instabilidade iha futuru boot liu duke saida mak ita enfrenta agora.

Impaktu hosi atensaun barak liu ba violencia durante eleisaun, ita mós haluha atu fó atensaun ba asuntu fundamental liu hosi eleisaun ida ne'e; mudansa iha politika – *kebijakan* – dezvoltamentu. Ita kontinua atu haluha katak *kebijakan* la matenek no la prudente ne'ebé ita foti agora bele kria instabilidade boot liu iha futuru. Hau koalia kona ba futuru la'os kona ba tinan atus ida oin mai. Maibé hau koalia kona ba tinan 10 to'o 15 oin mai, iha ita agora nia jersaun. Se ita haree eleisaun hanesan oportunidade osan mean ida ba ita atu lori evalua prosesu ida agora nian, no ita hare eleisaun hanesan mos oportunidade atu evalua politikus sira nia proposta no visaun ba oin, entaun tenki iha diskusaun kritiku kona ba *kebijakan* sira ne'ebé ita foti agora sei kria futuru ne'ebé di'ak ka ke'e hela rai ku'ak ba futuru. Ida ne'e mak tenki sai hanesan sentru atensaun ba ita sidadaun hotu.

Ita presiza seguransa la'os de'it ba tinan 2012, maibe ita presiza seguransa ba tempu naruk. No seguransa ba tempu naruk ida ne'e la'os de'it kona ba polisia no militar, ka paktu unidade nasional, ou metodu ba tempu badak nian. Ida ne'e presiza aproximasaun ida ne'ebe olistiku, integradu, no sustentavel. Tanba ida ne'e, importante tebes atu ita muda ita nia perspetiva kona ba konseitu seguransa ne'e rasik, hodi foka ba asuntu balu ne'ebé prinsipal liu. Dalan sira hanesan investimentu ba ema, kriaun kampu do servisu, diversifika ekonomia, hamenus dependensia ba importasaun no hamenus dependensia ba petroleu, hakotu siklus impunidade, proteze ema sira nia direitu ba rai, nu'udar mekanizmu importante hirak ne'ebe ita bele foti atu loke dalan ba ne'e.

Risku ba Instabilidade iha futuru boot liu duke agora

Maski ita barak preokupa ho risiko ba instabilidade agora, ita haree ba futuru, risiko boot liu atu mai iha tinan 10 ka 15 oin mai. Ema barak konsente hela ho ita nia ekonomia ida agora ne'e. Ita nia produtividade rai laran ki'ik, investimentu privadu ne'ebé boot kuaze la haree hetan. Ita importa sasan tomak ne'ebé ita uza. Komesa hosi komputador to'o bee mos ne'ebé ita konsumu kada loron. Investimentu estadu mak domina ekonomia tomak. Osan ne'ebé estadu gasta mak sirkula fali iha seitor

seluk hanesan infraestrutur, seitor serivisu – *pelayanan* – transferensia públiku no privadu, no balu tama fali ba estadu iha forma taxa.

Maibé ita tenki tau kakutak katak 82% orsamentu estadu 2012 sei mai hosi exportasaun petroleu. Tanba ne'e ita nia dependensia ba mina as tebes. Los duni katak pais seluk mós depende ba exportasaun seitor ida de'it. Maibé, differensia boot ho dependensia ba mina ka minerais ho dependensia ba seitor sira hanesan agrikultura ou renovavel seluk katak wainhira ita depende ba agrikultura, ita sei bele kuda fali ou aumenta tan. Maibé, ita nunka bele aumenta kwantidade mina iha rai okos, ka osan mean ka diamonde. Buat ne'ebé akontese mak nia menus hela de'it hosi tempu ba tempu.

Em a Timor oan hotu ne'ebé tuir informasaun hatene katak Timor-Leste la'os riku mina. Ita hotu tenki hatene **katak “tinan kotuk ita riku liu duke tinan agora nian,” no tinan oin ita sei kiak liu duke tinan ida ne'e.** Maski nune'e, ema ida sei nunka satisfaz ho servisu baziku sira hanesan edukasaun, saúde, be mós, no infraestrutur baziku ne'ebé ita hetan agora.

Iha tinan hirak liu ba, hau sempre hateten katak maski ita la'os riku mina, maibé se ita uza ho matenek, ida ne'e bele sufisiente. Ho asumsaun ida katak rendimentu ne'ebé ita hetan hosi mina sei uza atu lori dezenvolve seitor produtivu, hanesan agrikultura, turizmu, mikro industria, no investe ba ema, no investimentu seitor privadu. Maibé to'o agora, hau haree katak ida ne'e la los ona. Maski rendimentu hosi JPDA to'o ona nia *peak*, maibé seitor produtivu seluk seidak id a mak dezenvolve atu lori troka fali mina.

Petroleu iha JPDA – Bayu Undan no Kitan – sei hotu iha 2023. La'os koinsidente atu hatene katak wainhira Bayu Undan maran iha 2023, no iha tempu hanesan, maiz ou menus ema 360,000 mak sei tama kampu do servisu. Ida ne'e sei sai rekursu importante ba Timor. Sira ne'e bele sai traballador ida ne'ebe edukadu no treinadu ho di'ak, no bele sai katalyst ba dezenvolvimentu ekonomia Timor-Leste. Ida ne'e bele akontese wainhira ita investe no prepara sira nia futuru. Maibe, se ita la investe ba ita nia emar sira ne'e no la dezenvolve seitor ekonomia produtivu sira seluk, risku ba instabilidade iha futuru mos as.

Situasaun sei pior liu tan, tanba se Timor-Leste komesa foti tusan agora. Entaun iha tempu ida ne'e, Timor-Leste sei komesa selu fila fali tusan. Katak se karik osan iha, sei fó prioridade liu atu selu fali tusan ida ita deve agora, duke atu lori fornese servisu sosiais no kampu do servisu ba labarik sira ne'e. Entaun ita haree katak possibilidade ba instabilidade Timor nian iha tinan sanulu oin mai boot tebes, e boot liu tan duke agora se ita kontinua atu nega nafatin katak mina sei hotu, no ignora atu dezenvolve seitor produtivu seluk.

Tanba ida ne'e, hau hanoin importante tebes ba ita atu muda ita nia konseitu kona ba seguransa; hosi seguransa ne'ebé orienta liu ba militar no polisia ba seguransa ba ema nia moris. Ida ne'e la'os de'it kona ba ema mate rezulta hosi violensia fiziku. Ida n'e haree liu ba seguransa ba ema nia moris; seguransa ba ema nia futuru, no mate ka moras rezulta hosi sistema saúde públiku ne'ebé la di'ak, edukasaun ne'ebé falla atu prepara ema nia futuru, vulnerabilidade ba ai-han no hela fatin, no dezempregu.

Wainhira ita kontinua atu preokupa ba violensia durante eleisaun, ita lakon oportunidade atu fó atensaun ba asuntu sira ne'ebé fundamental liu. Ita kontinua atu nega katak edukasaun ne'ebé at sei hamosu instabilidade boot liu agora no futuru. Wainhira ita kontinua atu nega katak mina sei maran, no lakoi atu dezenvolve seitor sira seluk ne'ebé susentavel liu, ita nega mós katak dezempregu iha futuru sei as tebes, no sei sai ameasa boot liu tan ba estabilidade nasaun ne'e nian iha futuru.

Kombinasaun hosi ignoransia sirak iha leten, hamosu konseitu seguransa ida ne'ebé klot no ba tempu badak de'it. Ida ne'e tuir hau nia haree hanesan distorsaun ba atensaun públiku ba asuntu hirak ne'ebé prinsipal liu.